

Institute for
Population and
Development

2025

GODIŠNJI IZVJEŠTAJ

INSTITUT ZA POPULACIJU I RAZVOJ



Future4Youth Budućnost za mlade



DONATOR: CARE International Balkans, MES

Trajanje projekta: 01.08.2024. – 31.01.2026.

Info o projektu

IPD već više od deset godina ostvaruje stratešku regionalnu saradnju s organizacijom CARE International Balkans, koja je nastavljena i u 2024. godini, zajedno s partnerima Perpetuum Mobile (Banja Luka) i Centrom E8 (Beograd). U okviru ove saradnje implementira se Program Y (Young Men Initiative) – međunarodno nagrađeni, rodno sinhronizirani program za mlade. Projekat „Budućnost za mlade“ fokusiran je na uvođenje obrazovanja za životne vještine u školska i vanškolska okruženja, s ciljem jačanja rodne ravnopravnosti, zdravih odnosa, mentalnog i fizičkog zdravlja mladih te prevencije nasilja. Kroz sistemski pristup, projekat doprinosi razvoju kritičkog mišljenja, funkcionalne pismenosti i aktivnog učešća mladih u društvu.

NAJZNAČAJNIJE AKTIVNOSTI I REZULTATI U 2025. GODINI

Budi Muško i Fakat Cure klubovi: mladi za ravnopravnost, mentalno zdravlje i nenasilje

Tokom 2025. godine, Budi Muško i Fakat Cure klubovi djelovali su kao aktivne platforme za uključivanje mladih u promociju rodne ravnopravnosti, mentalnog zdravlja i prevenciju nasilja. Kroz redovne sastanke, edukativne i kreativne aktivnosti, mladi su aktivno učestvovali u osmišljavanju kampanja i inovativnih formata rada, razvijajući komunikacijske i organizacijske vještine te doprinoseći pozitivnim društvenim promjenama.

Radionice povećanja zdravstvene pismenosti i promocije zdravih stilova života u školama

U saradnji sa Srednjom medicinskom školom, Srednjom zubotehničkom školom, Srednjom školom primijenjenih umjetnosti i Osnovnom školom ŠIP u Sarajevu, tokom godine realizovan

je veliki broj radionica usmjerenih na mentalno zdravlje, emocionalnu inteligenciju, prevenciju vršnjačkog i rodno zasnovanog nasilja, kao i razvoj zdravih životnih navika, u kojima je učestvovalo više od 700 učenica i učenika. Radionice su provedene u okviru Programa Y i Programa E, uz aktivno učešće školskih pedagoga, psihologa i obučenih vršnjačkih edukatora. Kroz interaktivne metode, diskusije i praktične vježbe, učenici i učenice razvijali su vještine prepoznavanja i izražavanja emocija, asertivne komunikacije, donošenja odluka i traženja podrške. Posebna pažnja posvećena je temama digitalnog nasilja, mentalnih poteškoća kod mladih, rodnih stereotipa i zdravih odnosa. Veliki odaziv i pozitivne povratne informacije potvrdile su da su ovakvi sadržaji izuzetno potrebni u formalnom obrazovnom sistemu.

Radionice za unapređenje mentalnog zdravlja i socio-emocionalnih vještina mladih

Na deset radionica „Razgovor sa psihologinjom“, prisustvovalo je više od **200 učenica i učenika** Srednja škola primijenjenih umjetnosti, koje su mladima pružile siguran prostor za razgovor o mentalnom zdravlju i ličnom razvoju. Radionice su obuhvatile teme emocionalne inteligencije, komunikacijskih i socio-emocionalnih vještina, donošenja odluka, digitalnog nasilja, zloupotrebe psihoaktivnih supstanci, poremećaja u ishrani, kao i prepoznavanja i destigmatizacije depresije, anksioznosti i drugih psiholoških poteškoća.



Obuke vršnjačkih edukatora (TOT) i jačanje kapaciteta mladih lidera

Tokom 2025. godine realizovan je niz obuka za vršnjačke edukatore, uključujući višednevne treninge za srednjoškolce, mlade iz Budi Muško klubova i mlade iz institucija socijalne zaštite. Obuke su bile usmjerene na jačanje facilitatorskih vještina, razumijevanje rodne ravnopravnosti, prevenciju nasilja, mentalno zdravlje i seksualno i reproduktivno zdravlje. Mladi su kroz treninge stekli praktična znanja i samopouzdanje za vođenje radionica u svojim školama i zajednicama. Posebno značajan rezultat je osnaživanje mladih iz ranjivih grupa, uključujući mlade u Zavodu HUM, čime je dodatno potvrđena inkluzivnost i prilagodljivost Program Y metodologije.

Jačanje kapaciteta školskog osoblja za prevenciju nasilja i podršku mentalnom zdravlju djece i mladih

Realizirane su dvije dvodnevne obuke za nastavno i stručno osoblje Srednje medicinske škole Sarajevo i Osnovne škole „ŠIP“ Sarajevo, s ciljem jačanja kapaciteta škola za sistemsku prevenciju nasilja, unapređenje mentalnog zdravlja i promociju rodne ravnopravnosti. Ukupno je obučeno 37 nastavnika i stručnih saradnika. Treninzi su obuhvatili ključne teme poput savremenih izazova u razvoju djece i adolescenata, uticaja društvenih normi na nasilje, lokalnog

konteksta nasilja u BiH, mentalnog zdravlja djece i mladih te uloge vršnjačke podrške. Poseban fokus stavljen je na predstavljanje Programa Y, Programa E i Budi Muško kluba kao konkretnih, strukturiranih alata za rad u školskom okruženju. Kroz interaktivan i reflektivan pristup, učesnici su stekli praktična znanja i alate za jačanje podržavajuće školske klime, unapređenje povjerenja učenika u školske mehanizme podrške te dugoročno stvaranje sigurnog, nenasilnog i inkluzivnog obrazovnog okruženja.

Mladi glasovi protiv nasilja: umjetnost kao prostor izražavanja i osnaživanja

Realizovan je mentorski umjetnički program za mlade, kroz koji je 33 djece i mladih iz Javne ustanove za socijalnu zaštitu, odgoj i obrazovanje HUM i Srednje medicinske škole u Sarajevu učestvovalo u 12 kreativnih radionica posvećenih prevenciji nasilja. Korištenjem različitih likovnih tehnika, učesnici su kroz umjetnost izražavali emocije, lična iskustva i stavove o nasilju, uz poseban fokus na rad s mladima iz ranjivih grupa i stvaranje sigurnog i podržavajućeg okruženja. Program je zaključen javnom izložbom u Europe House-u, koja je potvrdila snagu umjetnosti kao alata za osnaživanje mladih, razvoj emocionalne pismenosti i promociju nenasilnih vrijednosti u zajednici.

Artivizam mladih: umjetnost kao alat prevencije nasilja i zagovaranja ravnopravnosti



Kreativne aktivnosti zauzele su važno mjesto u radu s mladima tokom godine. Kroz aktivnosti artivizma, mladi su koristili umjetnost kao alat za izražavanje emocija, ličnih iskustava i stavova o nasilju, identitetu i mentalnom zdravlju. Različite kreativne radionice i online kampanje omogućile su mladima da svoje poruke prenesu široj zajednici, čime su doprinijeli destigmatizaciji mentalnog zdravlja i podizanju svijesti o važnosti nenasilnih i ravnopravnih odnosa. U tom kontekstu, organizovana je i kreativna radionica sa članicama i članovima Budi Muško kluba i Fakat Cure Sarajevo, tokom koje su mladi kroz izradu transparenata i poruka aktivno izrazili stavove o rodnoj ravnopravnosti, radnim pravima i socijalnoj pravdi, te učestvovali u obilježavanju Međunarodnog dana žena kroz javni protestni mars.

Razvoj i validacija Strategije zagovaranja „Budućnost za mlade“

Tokom 2025. godine, mladi članovi i članice Budi Muško kluba i Fakat Cure, uz stručno vodstvo ekspertice iz oblasti zagovaranja, razvili su strategiju zagovaranja „IPD – Future for Youth“, koja je u junu i formalno predstavljena i validirana. U proces je bilo uključeno 19 mladih, a participativni pristup omogućio je da strategija odražava stvarne potrebe i iskustva mladih te postavi jasne zagovaračke prioritete i mehanizme djelovanja



Regionalne i javne kampanje: aktivno zagovaranje i vidljivost poruka mladih

U 2025. godini realizovane su brojne kampanje i javne akcije, uključujući obilježavanje Međunarodnog dana žena, Svjetskog dana mentalnog zdravlja, 16 dana aktivizma protiv rodno zasnovanog nasilja, kao i ljetne i online kampanje usmjerene na zdrave stilove života mladih. Kampanje su kombinovalе online i offline pristupe, uz snažan doprinos mladih u kreiranju sadržaja, poruka i vizuala.

Kroz društvene mreže, izložbe, performanse, medijske nastupe i javne događaje, poruke o rodnoj ravnopravnosti, mentalnom zdravlju i prevenciji nasilja dosegle su desetine hiljada ljudi, potvrđujući značaj mladih kao kredibilnih glasova promjene u društvu.

„Osoba koja sam sad i osoba koja sam bila prije 4 godine ne mogu se ni sresti u prolazu - osoba koja sam bila prije 4 godine je neko ko nije shvatao druge ljude, ko nije iskazivao svoja osjećanja i koga je bilo strah da se upozna sa drugim ljudima. Sada, kao edukator na kampu, otvoreno pričam o svojim osjećajima, otvoreno iskazujem sve svoje emocije i prenosim svoje znanje drugim ljudima. Razni tipovi ljude koje sam upoznala kroz Budi muško klub i kroz same projekte su me naučili da ne sudim knjigu po koricama - da ne osuđujem ljude koje ne znam, i to je jedna od najvećih promjena u mom životu“. Emina Hajro, 20 godina.



GODIŠNJI IZVJEŠTAJ O PROJEKTU DOYOU(TH) – 2025.



Mladi kao nosioci promjena: zdravlje, kreativnost i održivo blagostanje kroz DoYou(th)

Naziv projekta: DoYou(th)

Donator: Evropska unija (Erasmus+)

Trajanje projekta: 1.12.2024. – 30.11.2026.

Projekat DoYou(th) nastaje kao odgovor na sve izraženije izazove s kojima se mladi suočavaju u savremenim društvima – od pitanja mentalnog i fizičkog zdravlja, preko socijalne isključenosti, do ekonomske nesigurnosti i ograničenih mogućnosti za aktivno učešće u donošenju odluka. Polazeći od uvjerenja da su mladi ključni nosioci društvenih promjena, projekat DoYou(th) povezuje inovativne pristupe omladinskom radu, kreativno izražavanje i društvenu odgovornost s ciljem jačanja ličnih kapaciteta, otpornosti i aktivnog građanstva. Kroz regionalnu saradnju i primjenu savremenih metodologija, projekat doprinosi stvaranju zdravijih, pravednijih i održivijih zajednica u kojima mladi imaju znanje, alate i prostor da oblikuju vlastitu budućnost.

Cilj projekta DoYou(th) je osnažiti mlade i omladinske radnike kroz inovativne pristupe omladinskom radu, povezivanjem ličnih vrijednosti, društvene odgovornosti i kreativnih metodologija sa širim pitanjima zdravlja, ekonomskog i socijalnog blagostanja. Projekat se oslanja na savremene koncepte poput artizma, „donut“ ekonomije i socijalnog poduzetništva, s ciljem jačanja aktivnog građanstva i dugoročnog društvenog angažmana mladih u regionu.



Tokom 2025. godine, projektne aktivnosti bile su usmjerene na nekoliko međusobno povezanih pravaca djelovanja: jačanje kapaciteta partnerskih organizacija i omladinskih radnika, razvoj i lokalizaciju inovativnih metodologija, rad s mladima kroz javne i participativne događaje,

te snažnu komunikaciju i diseminaciju projektnih vrijednosti i rezultata. Poseban fokus IPD-a bio je na unapređenju komunikacijskih kapaciteta partnera, strateškom planiranju i provedbi kampanja na društvenim mrežama, te facilitiranju zajedničkih komunikacijskih procesa unutar partnerstva.

U oblasti izgradnje kapaciteta, IPD je aktivno učestvovao u regionalnim treninzima i online edukacijama, ali je i sam organizovao obuke za omladinske radnike. Posebno se ističe online trening „Socijalna odgovornost i istrajnost“, održan 31. oktobra 2025. godine, koji je okupio omladinske radnike iz različitih država. Trening je bio osmišljen kao interaktivan i refleksivan proces, kroz koji su učesnici povezivali lične vrijednosti i snage sa konkretnim akcijama u zajednici, te razvijali razumijevanje socijalne odgovornosti i istrajnosti kao ključnih životnih kompetencija.

Paralelno s tim, IPD je dao značajan doprinos lokalizaciji projektnih metodologija kroz prevođenje priručnika o artizmu, „ekonomiji krofne“ i socijalnom poduzetništvu na BHS jezike, kao i kroz izradu pratećih video-materijala. Time je osigurana veća dostupnost i praktična primjenjivost metodologija za omladinske radnike i organizacije u Bosni i Hercegovini.

U okviru rada s mladima i javnog djelovanja, posebno značajan događaj organizovan je 5. septembra 2025. godine u Trebinju. Događaj je okupio 79 predstavnika krovni organizacija mladih iz cijele Bosne i Hercegovine. Iako je centralna tema bila zdravlje mladih, događaj je poslužio i kao platforma za predstavljanje ključnih koncepata projekta DoYou(th) i njihove veze sa zdravljem, ekonomskim i socijalnim blagostanjem. Kao konkretan rezultat ovog susreta, u Trebinju je potpisana Deklaracija o unapređenju zdravlja mladih, koju su zajednički usvojili formalna tijela mladih Republike Srpske, Federacije Bosne i Hercegovine i Brčko distrikta, čime je napravljen važan iskorak ka međuentitetskoj saradnji i zajedničkom zagovaranju.

Tokom godine, IPD je imao vodeću ulogu u oblasti komunikacija i diseminacije projekta. Razvijen je zajednički vizuelni identitet projekta, komunikacijske smjernice za partnere, te alati za praćenje vidljivosti i dosega aktivnosti. Kroz ukupno 65 diseminacijskih i komunikacijskih aktivnosti, projekat je ostvario doseg od više od 60.000 osoba, pri čemu je najveći dio dosega ostvaren putem društvenih mreža, medijskih objava i video-sadržaja. Ove aktivnosti su značajno doprinijele prepoznatljivosti projekta i njegovih poruka među omladinskim radnicima, organizacijama civilnog društva i širom javnošću.

Postignuti rezultati tokom 2025. godine pokazuju da integracija inovativnih metodologija, snažne komunikacije i regionalne saradnje predstavlja efikasan pristup osnaživanju mladih. Projekat DoYou(th) je postavio čvrste temelje za daljnji rad s mladima, razvoj pilot-aktivnosti i dugoročni doprinos zdravijim, inkluzivnijim i otpornijim zajednicama.



PROGRAM ZDRAVE ZAJEDNICE U BOSNI I HERCEGOVINI

Osigurana je institucionalizacija i održivo funkcionisanje Centara za promociju zdravlja i prevenciju bolesti u Federaciji BiH i u Republici Srpskoj.

Razvijen je cjelovit paket normativnih, strateških i operativnih dokumenata koji omogućava institucionalizaciju i održivo funkcionisanje Centara za promociju zdravlja i prevenciju bolesti (CPP/MCPP) u Federaciji BiH i Republici Srpskoj. Paket obuhvata dva ključna dokumenta spremna za usvajanje, neophodna za pokretanje, odnosno standardizovano funkcionisanje CPP i MCPP-a. **To su izmjene i dopune pravilnika i naredbi kojima se CPP integriše u sistem primarne zdravstvene zaštite u FBiH, te nacrt pravilnika kojim se definišu minimalni uslovi za početak rada zdravstvenih ustanova u Republici Srpskoj, u dijelu relevantnom za MCPP.**

Nadalje, pripremljeni su dokumenti koji osiguravaju kontrolu i kvalitet sadržaja rada CPP/MCPP-a, kako slijedi:

- ♦ Standardi i normativi rada CPP-a, uključujući standarde sigurnosti i standarde kvaliteta, za oba entiteta;
- ♦ Standardizirani zbirni izvještajni obrasci, usklađeni sa važećim propisima;
- ♦ Tri modela finansiranja CPP-a u FBiH i dva modela finansiranja MCPP-a u Republici Srpskoj, kojima se osigurava održivo finansiranje CPP/MCPP-a;
- ♦ Mapa puta i Srednjoročni akcioni plan za prevenciju i kontrolu hroničnih nezaraznih bolesti u FBiH;
- ♦ Programi zaštite i promocije mentalnog zdravlja u FBiH i Republici Srpskoj za period 2025–2027, sa pripadajućim akcionim planovima;

Ovim dokumentima uspostavljen je jasan normativni okvir za rad CPP-a, njihovo finansiranje, izvještavanje, osiguranje kvaliteta i dugoročnu održivost.

Osiguravamo precizno detektovanje zdravstvenih potreba lokalnog stanovništva

U cilju jačanja saradnje unutar lokalne zajednice u oblasti zdravlja analizirana je funkcionalnost zdravstvenih savjeta/odbora u Federaciji BiH i Republici Srpskoj, te su razvijeni modeli poslovnika o radu odbora za zdravstvo u oba entiteta, kao osnova za sistemsko uključivanje lokalnih zajednica u planiranje, praćenje i podršku radu CPP/MCPP-a.

Zdravstveni profili JLS: Put do zdravih zajednica

Jedinstvena metodologija za 25 lokalnih zajednica u BiH

Napredak u uspostavljanju zdravstvenih savjeta/odbora u JLS

Ključni rezultati:

- 25 opština/gradova** uključeno u proces
- 16 zdravstvenih savjeta/odbora** aktivno (FBiH 6/13, RS 10/11)
- Većina članova su **zdravstveni radnici** (FBiH 50%, RS 70%)
- 25 lokalnih koordinatora za zdravstvo** imenovano (uključujući Brčko Distrikt)
- Održani sastanci lokalnih koordinatora u organizaciji Saveza opština i gradova
- Uspostavljeno **10 funkcionalnih** zdravstvenih savjeta/odbora

Napomena: Ove aktivnosti jačaju kapacitete lokalnih zajednica za planiranje i koordinaciju promotivno-preventivnih programa zdravstva.

Kroz projekat „Zdrave zajednice u BiH“, IPD je u saradnji s partnerima razvio i započeo primjenu jedinstvene, multisektorske metodologije zdravstvenih profila u 25 JLS, kao ključnog alata za planiranje promocije zdravlja i prevencije bolesti na lokalnom nivou.

Ključni rezultati programa



Obuke kao temelj kvaliteta zdravstvenih profila

U okviru projekta provedena su dva ciklusa obuka za primjenu metodologije i analizu podataka, tokom kojih je obučeno preko 200 učesnika, a prikupljeni podaci već se koriste za izradu zdravstvenih profila i planiranje unapređenja zdravlja u JLS.

Uporedni pregled ciklusa obuke

PRVI CIKLUS OBUKE		DRUGI CIKLUS OBUKE
Vrijeme i mjesto	Septembar 2025 - Teslić	Decembar 2025 - Sarajevo
Broj učesnika	99	116 (98 iz 25 JLS)
Struktura učesnika	48% zdravstveni 52% nezdravstveni	51% zdravstveni 49% nezdravstveni
Spolna zastupljenost	65,6% žene 34,4% muškarci	78% žene 22% muškarci
Fokus obuke	Metodologija, indikatori, ankete, fokus grupe	Analiza podataka, prioriteti, preporuke
Rezultat	Pokrenut istraživački proces u JLS	Osnaženi timovi za finalizaciju profila

Izrada zdravstvenih profila JLS predstavlja snažan iskorak ka odlučivanju zasnovanom na dokazima, jačanju lokalnih kapaciteta i održivom unapređenju zdravlja zajednica širom BiH. IPD će i u narednom periodu nastaviti pružati stručnu i tehničku podršku JLS u finalizaciji profila i njihovoj praktičnoj primjeni.

Pripremljene su Mapa puta za unapređenje primarne zdravstvene zaštite u Republici Izrađene su Mapa puta za unapređenje primarne zdravstvene zaštite u Republici Srpskoj i Mapa puta za unapređenje primarne zdravstvene zaštite u Federaciji Bosne i Hercegovine, uz razvijen dugoročni programsko-operativni plan implementacije zasnovan na ključnim polugama zdravstvenog sistema (upravljanje, resursi, usluge i finansiranje), kao ključni dokumenti za unapređenje primarne zdravstvene zaštite u Bosni i Hercegovini, usklađeni sa savremenim potrebama sistema i integracijom centara za promociju zdravlja i prevenciju bolesti u okviru primarne zdravstvene zaštite.



U okviru jačanja kapaciteta primarne zdravstvene zaštite, 545 zdravstvenih radnika osnaženo je kroz edukacije o ranom prepoznavanju i liječenju depresije (487 žena i 58 muškaraca). U Republici Srpskoj, program rane detekcije depresije implementiran je u 11 domova zdravlja, gdje 190 timova porodične medicine provodi skrining odraslog stanovništva; u prvih šest mjeseci obuhvaćeno je 4.805 osoba, od kojih je oko 1.000 upućeno na dalju stručnu podršku u centre za mentalno zdravlje. Paralelno, u Federaciji BiH održana je edukacija za 40 zdravstvenih radnika iz 12 domova zdravlja, dok je program pripremljen za 210 timova porodične medicine u 13 jedinica lokalne samouprave, čime su stvoreni preduslovi za ravnomjernu primjenu programa na području cijele zemlje.

Takođe, adaptiran je Paket osnovnih intervencija protiv nezaraznih bolesti u primarnoj zdravstvenoj zaštiti (PEN protokol), koji pruža strukturiran i standardizovan pristup ranom otkrivanju, praćenju i liječenju vodećih hroničnih nezaraznih bolesti, uz naglasak na preventivne mjere i promociju zdravih stilova života, te podstiče aktivnu ulogu timova porodične medicine i centara za promociju zdravlja i prevenciju bolesti. Cjelokupan pristup zasnovan je na međunarodnim standardima Svjetske zdravstvene organizacije.

Bosna i Hercegovina je dio zemalja s modernim zakonodavstvom o kontroli duhana!

Federaciji Bosne i Hercegovine, Zakon o kontroli i ograničenoj upotrebi duhana, duhanskih i ostalih proizvoda za pušenje usvojen je u martu 2022. godine, stupio je na snagu 18. maja 2022., a puna primjena započela je u maju 2023. godine. U cilju operativne provedbe Zakona, donesen je i Pravilnik o uslovima za određivanje posebne prostorije za pušenje, kojim su precizno definisani uslovi, način označavanja i organizacija prostora u kojima je pušenje izuzetno dozvoljeno.

U Republici Srpskoj, Narodna skupština RS usvojila je Zakon o zaštiti zdravlja stanovništva od duvanskih i ostalih proizvoda za pušenje 24. decembra 2025. godine. Zakon je objavljen u Službenom glasniku Republike Srpske i stupa na snagu 1. augusta 2026. godine, uz prelazni period od godinu dana prije pune primjene zabrana i ograničenja, uključujući zabranu pušenja u zatvorenim javnim prostorima te regulaciju prodaje i reklamiranja proizvoda za pušenje.

Najznačajniji Sastanci sa donosiocima odluka

Jedan od najznačajnijih postignutih rezultata je uspostavljanje koordiniranog međusektorskog odgovora sektora zdravstva i obrazovanja, koji je formaliziran tokom dvodnevnog sastanka održanog u Neumu 8. i 9. oktobra 2025. godine. Ovom događaju su, po prvi put u historiji Bosne i Hercegovine, prisustvovali gotovo svi kantonalni ministri zdravstva i ministri obrazovanja, čime je osigurana politička i institucionalna legitimnost za zajedničko djelovanje. Na sastanku je dogovoren set konkretnih zajedničkih aktivnosti te je inicirana promjena paradigme međusektorske saradnje, sa pomaka sa ad hoc i fragmentiranih inicijativa ka planskom, koordiniranom i preventivno orijentisanom pristupu. Ovaj događaj predstavlja jedan od najvažnijih iskoraka u oblasti promocije zdravlja i prevencije nezaraznih bolesti koji istovremeno uključuje oba sektora.



*Kantonalni ministri zdravstva
i ministri obrazovanja, FBiH*

U **aprilu 2024. godine, u organizaciji Projekta**, a na poziv Federalnog ministra zdravstva, održan je zajednički sastanak **svih 10 kantonalnih ministara zdravstva**, po prvi put nakon deset godina. Sastanku je prisustvovalo **46 učesnika**, uključujući federalnog i kantonalne ministre zdravstva, direktore kantonalnih zavoda za javno zdravstvo i zdravstveno osiguranje, te predstavnike Ambasade. Cilj sastanka bio je **institucionalno pozicioniranje centara za promociju zdravlja i prevenciju bolesti (CPP)** u zdravstvenom sistemu FBiH, uz fokus na **predstavljivanje i prihvatanje modela financiranja CPP-a**.



*Sastanak kantonalnih
ministara zdravstva, FBiH.*

Ključni rezultati u oblasti saradnje sektora obrazovanja i zdravstva

- ✓ Razvijeni i primijenjeni sveobuhvatni, metodološki utemeljeni instrumenti za preciznu analizu obrazovnih sadržaja i pristupa učenju o prevenciji nezaraznih bolesti u predškolskim ustanovama, osnovnim i srednjim školama.
- ✓ Provedene sistemske i uporedive analize zastupljenosti sadržaja i pristupa učenju o nezaraznim bolestima u svih 10 kantona Federacije BiH, Republici Srpskoj i Brčko distriktu Bosne i Hercegovine, čime je po prvi put osigurana cjelovita slika stanja na nivou zemlje.
- ✓ Realizirane stručne i međusektorske konsultacije o budućim pravcima ulaganja u prevenciju nezaraznih bolesti, kroz panel diskusije održane u Sarajevu i Banjoj Luci, uz učešće predstavnika obrazovnog i zdravstvenog sektora.
- ✓ Kreiran set konkretnih, na dokazima zasnovanih preporuka za razvoj obrazovnih sadržaja i unapređenje međusektorske saradnje u prevenciji nezaraznih bolesti u svih 10 kantona Federacije BiH, Republici Srpskoj i Brčko distriktu Bosne i Hercegovine.

Jačanje kapaciteta civilnog sektora i unapređenje javnog zdravlja širom Bosne i Hercegovine.

Ključni fokus bio je na procjeni kapaciteta organizacija civilnog društva (OCD) u 25 jedinica lokalne samouprave (JLS), što je poslužilo kao osnova za identifikaciju partnera u implementaciji preventivno-promotivnih programa. Ostvaren je direktan kontakt sa 30 OCD iz 25 JLS. Kroz tri ciljana sastanka, detaljno je ispitana motivacija i spremnost ovih organizacija za aktivno učešće u projektu. Potom je IPD organizovao prvi u nizu od četiri stručna treninga, pod nazivom „Javno zdravlje i OCD“, namijenjen predstavnicima organizacija iz partnerskih JLS. Trening je uspješno završilo 52 predstavnika OCD. Pored jačanja OCD sektora, IPD je značajno doprinio stručnom diskursu i povodom obilježavanja Dana mentalnog zdravlja, podržao organizaciju konferencije „Komorbiditet psihičkih poremećaja i tjelesnih bolesti stanovnika Federacije BiH“.

Kroz promotivno-preventivne aktivnosti, u okviru Festivala zdravlja povodom obilježavanja Svjetskog dana zdravlja, IPD je podržao implementaciju projekta „Hajde da rastemo zajedno“ u Doboju, koji je okupio oko 300 građana i građanki. Tokom Susreta mladih Republike Srpske, IPD je kofacilitirao događaj „Mladi i zdravlje“ koji je okupio preko 90 mladih osoba iz cijele BiH. Rezultat ove inicijative je potpisivanje Deklaracije o posvećenosti unapređenju zdravlja mladih u BiH od strane krovnih omladinskih organizacija, čemu je prethodila panel diskusija o ključnim izazovima sa kojima se mladi suočavaju u domenu zdravlja.

Bolja hitna pomoć uz saradnju civilnog sektora i lokalnih vlasti



Doprinos organizacija civilnog društva strateškom planiranju zdravstvene zaštite u Bosni i Hercegovini u skladu s EU standardima

Donator: Evropska unija

Trajanje projekta: 1.2.2024. - 1.2.2027.

Cilj projekta je osnažiti organizacije civilnog društva da kroz razmjenu znanja i konstruktivan dijalog s različitim nivoima vlasti doprinesu unapređenju zdravstvene zaštite i hitne medicinske pomoći u Bosni i Hercegovini.

Projektne aktivnosti u 2025. godini su bile usmjerene na dva međusobno povezana pravca djelovanja: jačanje kapaciteta organizacija civilnog društva za sudjelovanje u procesima donošenja odluka i unapređenje sistema hitne medicinske pomoći kroz zagovaranje sistemskih rješenja i jačanje stručnih kapaciteta. Poseban naglasak stavljen je na unapređenje lokalnog upravljanja u zdravstvu kroz analizu strateških dokumenata i izradu preporuka za jedinice lokalne samouprave.



Sastanak direktora domova zdravlja, šefova službi za hitnu medicinsku pomoć i lokalnih koordinatora za zdravstvo iz Republike Srpske, Banja Luka, juni 2025.

Kako bi organizacije civilnog društva mogle aktivno i argumentovano sudjelovati u procesima donošenja odluka, projekt je tokom 2025. godine organizovao dvije radionice iz oblasti javnog zagovaranja i javnih konsultacija. Radionice su provedene u saradnji s organizacijama okupljenim oko Koalicije za zdravlje "Salus". Ojačano je ukupno devet organizacija - članica Koalicije, dok je više od četrdeset predstavnika organizacija steklo praktična znanja o zagovaračkim alatima, pripremi inicijativa, sudjelovanju u javnim raspravama te praćenju i analizi javnih politika, čime su osnaženi za daljnje zajedničko djelovanje u lokalnim zajednicama.

Projekt je paralelno doprinio jačanju stručnih kapaciteta timova hitne medicinske pomoći. U 11 projektnih lokacija, obučeno je 96 članova timova hitne medicinske pomoći kroz međunarodno priznate programe osnovnog i naprednog održavanja života i prehospitalnog zbrinjavanja traume, čime je postavljen temelj za dugoročno unapređenje kvalitete ove ključne zdravstvene usluge.



Edukacija timova hitne medicinske pomoći iz Federacije BiH, Sarajevo, oktobar 2025

Projekt je dodatno doprinio unapređenju lokalnog upravljanja u zdravstvu kroz analizu strateških dokumenata 11 jedinica lokalne samouprave. U 2025. godini su završene pojedinačne analize, a nalazi istraživanja su objedinjeni u dokumentu Strateški planovi jedinica lokalne samouprave u Bosni i Hercegovini. Na temelju nalaza formulirane su preporuke koje se odnose na jačanje strateškog planiranja u oblasti zdravlja i povećanje odgovornosti lokalnih vlasti prema zdravlju građana.

Postignuti rezultati pokazuju da povezivanje civilnog društva, zdravstvenih institucija i lokalnih vlasti stvara snažan mehanizam za identifikaciju potreba građana i njihovu transformaciju u konkretne politike. Ulaganje u zdravstvo pokazuje se kao ulaganje u sveukupni društveni razvoj i dobrobit građana.



Edukacija timova hitne medicinske pomoći iz Republike Srpske, Banja Luka, novembar 2025.

Unapređenje sustava socijalne potpore djeci i mladima u riziku na području Županije Središnja Bosna



Donator: Republika Hrvatska Ministarstvo rada, mirovinskoga sustava, obitelji i socijalne politike

Trajanje projekta: 12.04.2024. - 30.06.2025.

Info o projektu

Izazovi lokalnih zajednica i njihovo osnaživanje predstavljaju temelj djelovanja Instituta za populaciju i razvoj tokom 23 godine rada. Kroz partnersku saradnju s lokalnim zajednicama i institucijama, IPD kontinuirano analizira potrebe i razvija održiva, sistemska rješenja koja imaju dugoročan učinak i nakon završetka projekata. Poseban fokus organizacije usmjeren je na jačanje kapaciteta institucija zdravstvene i socijalne skrbi, uz blisku saradnju s obrazovnim, zdravstvenim i socijalnim ustanovama u Županiji Središnja Bosna te kontinuirano unapređenje partnerstava s relevantnim dionicima na lokalnom nivou.

NAJZNAČAJNIJE AKTIVNOSTI I REZULTATI U 2025. GODINI

Unaprijeđen referalni mehanizam i međusektorska podrška djeci i mladima u riziku u ŽSB

Projekt je doprinio jačanju koordinacije između obrazovnog, socijalnog, zdravstvenog i sigurnosnog sektora u općinama Vitez i Busovača, kroz zajedničko planiranje i uspostavljanje konkretnijih mehanizama upućivanja i saradnje. Održani su okrugli stol i završna konferencija, koji su okupili ključne dionike (škole, centri za socijalnu skrb, centri za mentalno zdravlje, policija i lokalna vlast) i otvorili prostor za dogovor o efikasnijoj podršci djeci i mladima u riziku, s posebnim naglaskom na prevenciju nasilja i krizne situacije.

Osnaženi kapaciteti stručnjaka u školama i sistemu socijalne i zdravstvene zaštite

Kroz dvije faze edukacije (osnovna i napredna), projekt je ojačao kompetencije nastavnika, stručnih saradnika (psihologa/pedagoga) te zaposlenika centara za socijalnu skrb i centara za mentalno zdravlje za prepoznavanje, prijavljivanje i odgovor na nasilje, kao i za postupanje u kriznim situacijama. Edukacije su provedene iskustveno i radionički, uz praktične alate za intervenciju, te su rezultirale vidljivim napretkom u znanju, svijesti i spremnosti za djelovanje u zaštiti djece i mladih.



Razvijen i distribuiran stručni priručnik kao alat održivosti

U okviru projekta izrađen je stručni priručnik „Blagostanje djece i mladih: alati za potporu i prevenciju“ publikacija s praktičnim smjernicama (u digitalnom formatu), namijenjen nastavnicima i stručnim službama, kao i profesionalcima iz socijalne i zdravstvene zaštite. Priručnik pruža jasne preporuke i konkretne metode za stvaranje podržavajuće školske klime, jačanje socio-emocionalnih vještina djece, prevenciju nasilja i razvoj integriranog, multisektorskog pristupa zaštiti djece u riziku.

Ojačana prekogranična saradnja i razmjena dobrih praksi

Projekt je dodatno institucionalizirao saradnju između IPD-a i partnerske organizacije **Društvo za psihološku pomoć (DPP), Zagreb**, kroz zajedničku pripremu materijala, metodološku pripremu mentora, provođenje edukacija i organizaciju javnih događaja. Kroz uključivanje hrvatskih stručnjaka osigurana je razmjena iskustava i prenošenje provjerenih pristupa u radu s djecom i mladima u riziku, što je doprinijelo unapređenju lokalnih praksi i jačanju stručnih mreža u zajednici.

Visok obuhvat korisnika i snažan lokalni učinak

Projektom je obuhvaćeno 110 profesionalaca iz sektora obrazovanja, socijalne i zdravstvene skrbi u Županiji Središnja Bosna (Vitez i Busovača), čime je ojačana prva linija podrške djeci i mladima u riziku. Kroz provedene edukacije značajno su unaprijeđeni kapaciteti stručnjaka za pravovremeno prepoznavanje, prevenciju i reagiranje na nasilje, te za međusektorsku saradnju, što dugoročno doprinosi sigurnijem i podržavajućem okruženju za djecu i mlade. Kao dodatni rezultat, izrađen je stručni priručnik koji nastavnicima i stručnim suradnicima pruža konkretne, praktične materijale za jačanje emocionalnih i socijalnih vještina učenika, osiguravajući održivost i primjenu projektnih rezultata u svakodnevnom radu.

Nastavak i održivost: pokrenut novi projekt kao logičan nastavak intervencije

Na temelju postignutih rezultata i jasno prepoznatih potreba na terenu, osiguran je nastavak aktivnosti kroz novi projekt „Unapređenje lokalnog odgovora u kriznim situacijama kroz jačanje sustava socijalne i psihološke potpore djeci i mladima u Županiji Središnja Bosna“, financiran od istog Ministarstva. Time je osiguran kontinuitet rada na uvođenju kriznih protokola, jačanju školskih mehanizama podrške, superviziji i daljem razvoju međusektorske saradnje.



MINDMATTERS: OSNAŽIVANJE MLADIH ZA MENTALNO BLAGOSTANJE

Donator: IPPF EN

Trajanje projekta: Novembar 2024 – Juni 2025.

Info o projektu

Tokom 2025. godine, Institut za populaciju i razvoj (IPD) implementirao je projekat MindMatters: Osnaživanje mladih za mentalno blagostanje, s ciljem unapređenja mentalnog zdravlja mladih kroz participativne, preventivne i edukativne intervencije. Projekat je odgovorio na sve izraženije potrebe mladih u Bosni i Hercegovini za dostupnim, razumljivim i destigmatiziranim pristupima mentalnom zdravlju, uz snažan fokus na aktivno uključivanje mladih u osmišljavanje i realizaciju aktivnosti.

NAJZNAČAJNIJE AKTIVNOSTI I REZULTATI U 2025. GODINI

Najznačajniji rezultat projekta bilo je **razvijanje i lansiranje prvog Mental Health First Aid Kita za mlade u Bosni i Hercegovini**. Priručnik je nastao kroz proces direktne ko-kreacije s mladima, koji su učestvovali u istraživanju potreba, razvoju sadržaja, dizajnu i testiranju materijala, uz stručnu podršku profesionalaca iz oblasti mentalnog zdravlja. Priručnik sadrži praktične alate za samopomoć, tehnike disanja, strategije za nošenje sa stresom i anksioznošću, kao i jasne informacije o dostupnim oblicima stručne pomoći, čime je mladima ponuđen konkretan i primjenjiv alat za svakodnevnu brigu o mentalnom zdravlju.

Paralelno s razvojem priručnika, projekat je obuhvatio niz edukativnih aktivnosti, uključujući radionice i online webinare o mentalnom zdravlju, usmjerene na jačanje mentalne pismenosti i kapaciteta mladih za prepoznavanje i razumijevanje vlastitih emocionalnih stanja. Kroz ove aktivnosti, mladi su stekli osnovna znanja o mentalnom zdravlju, važnosti traženja podrške i ulozi vršnjačke solidarnosti, dok je poseban akcenat stavljen na stvaranje sigurnog prostora za otvoren razgovor o temama koje su često opterećene stigmatizacijom.


Projekat je dodatno doprinio **smanjenju stigme vezane za mentalno zdravlje mladih** kroz ciljanu komunikacijsku kampanju na društvenim mrežama i javne online aktivnosti. Kroz poruke kreirane od strane mladih i za mlade, otvoren je prostor za normalizaciju razgovora o mentalnom zdravlju i jačanje svijesti o važnosti pravovremene podrške, čime je ostvaren značajan doseg i vidljivost projektnih poruka širom Bosne i Hercegovine.

Kao važan korak ka održivosti, u okviru projekta uspostavljeni su temelji peer-to-peer mreža podrške, s ciljem jačanja lokalnih kapaciteta za neformalnu, vršnjačku podršku u školama i zajednicama. Također, jasno je definisana vizija daljnje primjene Mental Health First Aid Kita u obrazovnim i omladinskim okruženjima, čime su postavljeni temelji za dugoročniji učinak projekta i njegovu integraciju u postojeće programe rada s mladima.

Projekat MindMatters dodatno je ojačao poziciju IPD-a kao relevantnog aktera u oblasti mentalnog zdravlja mladih, potvrđujući kapacitet Instituta za razvoj inovativnih, participativnih i mladima prilagođenih intervencija koje imaju jasan društveni učinak i potencijal za širu primjenu.

SVJETSKI DAN ZDRAVLJA HEALTHFEST 2025

7. april 2025. | Sarajevo, Banja Luka, Dobo



Povodom obilježavanja Svjetskog dana zdravlja, Institut za populaciju i razvoj (IPD) organizovao je HealthFest 2025, višednevni i višelokacijski festival posvećen promociji zdravlja, prevenciji bolesti i jačanju zajedničke odgovornosti za javno zdravlje u Bosni i Hercegovini.

HealthFest je realizovan kao dinamična i inkluzivna platforma koja je okupila predstavnike institucija, zdravstvene i obrazovne stručnjake, organizacije civilnog društva, medije, djecu, mlade i širu javnost, s ciljem jačanja multidisciplinarnog i preventivnog pristupa zdravlju.

Centralni dio festivala održan je u Europe House u Sarajevu, dok su dodatne aktivnosti realizovane u Banjoj Luci i Doboju, čime je HealthFest dobio snažnu nacionalnu dimenziju.

ZDRAVLJE KAO ZAJEDNIČKA ODGOVORNOST

Otvarajući HealthFest, **Emina Osmanagić, direktorica Instituta za populaciju i razvoj**, istakla je da zdravlje ne podrazumijeva samo odsustvo bolesti, već pravo svakog pojedinca na informisanost, podršku, sigurno okruženje i mogućnost izbora:

„Zdravlje nije samo odsustvo bolesti, to je i pravo na dostojanstven život, podršku zajednice i sistem koji prepoznaje potrebe ljudi. HealthFest je prostor gdje zajedno razgovaramo, učimo i gradimo zdravije društvo.“

Značaj festivala prepoznali su i predstavnici vlasti. **Načelnik Općine Centar Sarajevo Srđan Mandić** naglasio je važnost ulaganja u prevenciju i edukaciju djece i mladih, dok je **kantonalni ministar zdravlja dr. Enis Hasanović** istakao da ovakvi događaji doprinose jačanju svijesti o zdravlju, zdravoj ishrani i fizičkoj aktivnosti, kao temelju kvalitetnog društva. **Dr. Goran Čerkez,**

pomoćnik ministra za javno zdravlje Federalnog ministarstva zdravstva, istakao je da se borba protiv nezaraznih bolesti mora voditi sistemski i dugoročno:

„Prevenција nezaraznih bolesti mora početi mnogo ranije, u obrazovnom sistemu. Škole nisu samo mjesto učenja, već prostor u kojem se formiraju životne navike. Ako mladim ljudima na vrijeme pružimo znanja i vještine o zdravlju, ishrani, fizičkoj aktivnosti i mentalnoj otpornosti, dugoročno gradimo otpornije društvo i održiviji zdravstveni sistem.“

PODRŠKA MEĐUNARODNIH PARTNERA

HealthFest 2025 realizovan je uz snažnu podršku međunarodnih partnera.

Lizerot Karel, predstavnik Evropske unije u Bosni i Hercegovini, naglasio je važnost saradnje s civilnim društvom u jačanju zdravstvenog sistema u skladu s EU standardima, ističući HealthFest kao vrijednu platformu za dijalog i razmjenu znanja.

Siroco Messerli, direktor za saradnju Ambasade Švicarske u BiH, istakao je dugogodišnju podršku Vlade Švicarske programima javnog zdravlja, posebno programu **Zdrave zajednice u BiH**, koji jača lokalne kapacitete i uključuje zajednicu u unapređenje zdravlja.

KLJUČNI PROGRAMSKI SADRŽAJI HEALTHFESTA

Mentalno zdravlje i prevencija

Posebna pažnja posvećena je mentalnom zdravlju, kroz:

- interaktivnu studentsku sesiju „Mentalno zdravlje kao potpora fizičkom zdravlju“
- aktivnosti u Banjoj Luci usmjerene na ranu detekciju i prevenciju depresivnih poremećaja u primarnoj zdravstvenoj zaštiti
- potpisivanje ugovora o saradnji s domovima zdravlja iz 11 lokalnih zajednica



Obrazovanje i zdravlje

Panel diskusije u Sarajevu i Banjoj Luci bavile su se ulogom formalnog obrazovanja u prevenciji nezaraznih bolesti, uz učešće predstavnika obrazovnog i zdravstvenog sektora, naglašavajući potrebu za sistemskim uključivanjem zdravstvenih tema u obrazovne programe.

Medijski panel – „Medijsko izvještavanje o zdravlju“

Jedan od centralnih događaja HealthFesta bio je medijski panel posvećen odgovornom izvještavanju o zdravlju. Panelisti su razgovarali su o tačnosti, etici i dostupnosti zdravstvenih informacija. Federalna novinska agencija FENA je bila i medijski partner festivala, dodatno jačajući vidljivost i javni dijalog o zdravlju.

Zdravi stilovi života

Sesija „Aktivan život za zdravlje“ predstavila je programe Centra za sport i rekreaciju, naglašavajući fizičku aktivnost kao ključni faktor očuvanja fizičkog i mentalnog zdravlja.

Hitna pomoć po EU standardima

U saradnji s Centrom za edukaciju hitne medicinske pomoći „Prim. dr. Silva Rizvanbegović“, održana je sesija o savremenoj organizaciji hitne pomoći, u skladu s evropskim standardima.



Uloga inovativne farmaceutske industrije

Učesnici su se upoznali s djelovanjem Udruženja inovativnih proizvođača lijekova u BiH, njihovim zagovaračkim aktivnostima i partnerstvima s institucijama u cilju unapređenja zdravstvenog sistema.

Koalicija za zdravlje „SALUS“

Predstavljena je novoosnovana Koalicija „SALUS“, platforma organizacija civilnog društva usmjerena na zagovaranje kvalitetnijih zdravstvenih usluga u skladu s EU standardima.

Zdravstveni profili lokalnih zajednica

Kroz sesiju „Put do zdrave zajednice“, lokalni koordinatori lokalnih zajednica iz BiH upoznali su se s metodologijom izrade zdravstvenih profila kao alata za donošenje informisanih odluka na lokalnom nivou.

DJECA, MLADI I KULTURA ZDRAVLJA

HealthFest je obuhvatio i:

- edukativne radionice za djecu o oralnom i općem zdravlju (Vrtić Maslačak, Sarajevo)



- umjetnički program „Glasovi mladih: Umjetnošću protiv nasilja“, koji kroz kreativni izraz jača emocionalnu pismenost, otpornost i nenasilnu komunikaciju



- festivalski program u Doboju – „Hajde da rastemo zajedno“, realizovan u saradnji s lokalnim partnerima



HealthFest 2025 potvrdio je da je zdravlje zajednička odgovornost i da se održive promjene mogu postići samo kroz saradnju institucija, civilnog društva, medija i građana.

Kroz edukaciju, dijalog, kreativne sadržaje i konkretne primjere dobre prakse, HealthFest je dao snažan doprinos promociji zdravih stilova života, mentalnog zdravlja i prevencije bolesti, ostavljajući jasnu poruku:

Zdravlje počinje u zajednici – i zajedno ga možemo unaprijediti.

Više od dva i pol miliona ljudi informisano o radu Instituta za populaciju i razvoj

Godišnji izvještaj o komunikacijama i vidljivosti Instituta za populaciju i razvoj potvrđuje snažan medijski i digitalni doseg ostvaren tokom protekle godine, kao i kontinuirano jačanje prepoznatljivosti Instituta u javnosti.

Medijski doseg

Institut za populaciju i razvoj privukao je značajnu pažnju domaćih i regionalnih medija, koji su prepoznali važnost programa, projekata i aktivnosti usmjerenih ka unapređenju zdravlja i kvaliteta života u zajednici. Tokom izvještajnog perioda objavljeno je **350 neplaćenih medijskih priloga** na televiziji, radiju, web-portalima i u štampanim medijima. Najveći udio objava ostvaren je na web-portalima i u elektronskim medijima, koji čine **82% ukupnog medijskog sadržaja**.

Istaknuti mediji

Najveći broj objava zabilježen je na portalima i kanalima **Federalne novinske agencije (FENA), Radio-televizije Federacije Bosne i Hercegovine (RTV FBiH), SRNA-e, BHRT-a i Radio-televizije Republike Srpske (RTRS)**. Pored njih, interes su pokazali i brojni drugi javni i privatni mediji, uključujući i regionalne, čime je dodatno proširen domet ključnih poruka Instituta.

Vrijednost medijskih objava

Procijenjena tržišna vrijednost ostvarenih medijskih objava iznosi **305.253,56 KM**, dok je putem medija o radu Instituta informisano približno **1.550.000 osoba**, što predstavlja izuzetno snažan pokazatelj povjerenja i relevantnosti tema kojima se Institut bavi.

Društvene mreže i digitalni kanali

Na društvenim mrežama – **Facebooku, YouTubeu i Instagramu** – Institut je ostvario doseg od 550.000 osoba, uz ukupno **76.000 pratilaca**. Digitalni sadržaji zabilježili su **3.050.000 pregleda**, a ove platforme imale su ključnu ulogu u svakodnevnoj komunikaciji s publikom, omogućavajući pravovremeno informisanje, dvosmjernu interakciju i jačanje povjerenja javnosti.

Dosljedna transparentnost, relevantan sadržaj i kvalitetan protok informacija pozicionirali su Institut za populaciju i razvoj kao pouzdanog i kredibilnog partnera u oblasti zdravlja i promocije zdravih stilova života. Kroz kombinaciju medijskih i digitalnih kanala, ključne poruke i servisne informacije uspješno su plasirane do više od **2 i pol miliona ljudi**, uključujući **1.550.000 osoba putem medija i 550.000 putem društvenih mreža**.

Ukupan broj medijskih objava:	Najzastupljeniji mediji:	Vrijednost medijskih objava:	Broj osoba informisanih putem medija:	Doseg društvenih mreža:	Ukupan broj pratilaca:	Pregledi sadržaja na društvenim mrežama:	Najkorištenije društvene mreže:
350 neplaćenih priloga (TV, radio, web-portali, štampani mediji)	Web-portali i elektronski mediji (82% objava), FENA, RTV FBiH, SRNA, BHRT, RTRS.	305.253,56 KM	1.550.000	500.000 osoba	76.000	3.050.000	Facebook, YouTube, Instagram

25 GODINA

Iza nas je dvadeset pet godina predanog rada koji je rezultirao brojnim uspjesima u različitim sferama djelovanja.



